

三十三冊

卷之十三

文獻指掌三

林下筆記

欽定四庫全書

文獻通考

卷之十三

七

按詳便答毛文龍新曆

西曆曆法

時憲書

論曆法

曆中國術書

歷代甲子

林下筆記卷之十三

文獻指掌編目錄

三

開闢筭

七政曆

接伴使荅毛文龍新曆

西洋曆法

時憲書

論曆法

購中國術書

英宗甲子

起樓賜裘

兼教授

救食

儀器

大鍾

鍾之變

分野

瑞葱臺

淡婆姑

太學銀杏樹不實

繫馬樹

柿木有字

嘉穀

追錄佐命勲

鎮江神馬

濶口瓶

北漢

廢四郡議

均疆之議

王后本貫邑不降

監司兼帶牧府不降

山之宗十二

水之宗十二

三角山

追慕峴

追慕洞

濬川

地脉

金剛山

五臺山水比楊子江

鏡浦臺

三日浦

太宗臺

白頭山

龍灣駐蹕

鴨綠江

威化島

妙香山

薛列罕嶺

鳳林

椒井

俗離山

溫泉幸行

無等山

湖西四郡

月出山

漢拏山

智異山

南方最大山

晉江得印

伽倻山

北廢四郡故事

域內道里

都城

都京備五德

仁王洞丹書

改築

遷都議

南小門開閉之論

北漢築城議

南漢築城

江都

臨津長江設置

禿城山城

大興山城

青石洞

雙樹山城

忠州為漢水上流

南海防

對馬島之始

絕影島路

欲智島還屬統營

左右水營移議

西海之南

耽羅路程

安興鎮

江都所屬關防

西海之北

椴島

白翎鎮初設

西南海路

中國相通海路

沿海亭館

海中師路

漕路

西海犯越防守

日本交聘海路

潮汛

帶方城

湖南山城

烏嶺城

統營

關東要衝

海西要衝

三防嶺

永豐設邑議

安州為咽喉

義州鶴形

慈母山城

鐵籠山城

平壤府合城中城

諸州基

設柵要法

築城訣

築城以麗議

江邊七邑養木之議

赤島

鬱陵島

壽昌宮

本朝宮室興廢

敬奉閣

奎章閣

各宮

文廟

廟祠

各司

東朝萬壽殿

景福宮修理

敬德宮

穆清殿

江華府

廣州府

狎鷗亭

逍遙亭

清心樓

廣寒樓

慶州府

映湖樓

真龜石樓

嶺南樓

蓬萊閣

昭陽亭

海山亭

月波樓

芙蓉堂

洞仙別館

咸興府

永興府

平壤府

統軍亭

降仙樓

林下筆記卷之十三

月城李裕元景春輯

文獻指掌編

開闢筭

唐堯甲辰至洪武戊申三千七百八十五年檀君戊辰至我太祖壬申亦三千七百八十五年帝堯作而檀君興周武立而箕子封漢定天下衛滿來宋祖將興而麗祖已起我太祖開國亦與太祖皇帝同時

七政曆

世宗命鄭麟趾等撰七政筭內外篇推步交食法

接伴使荅毛文龍新曆

仁祖時毛文龍求得東國新年曆書接使曰諸侯遵奉天王正朔然我國僻處若待欽天監頒曆則祭祀軍旅吉凶推擇等事必致後時故私自推法云

西洋曆法

仁祖九年鄭斗源回進西洋人陸若漢所贈治曆緣起一卷天文略一卷自鳴鐘一部千里鏡一部日晷觀一坐西洋去中國九萬里中州用曆全用其言云

時憲曆

仁祖二十三年觀象監提調金堉請用洋人湯若望

時憲曆至孝宗四年始行時憲法初金埴入燕聞湯
若望法始得門路為領事奏請行之又遣金尚范重
賂學術死於途中竟未盡得肅宗朝始用五星法盖
崇禎初命徐光啓與洋人湯若望開局其意大畧如
是

論曆法

金錫胄曰洛下太初曆始用夏正其法善於張蒼之
顓頊曆矣姜岌三紀曆始以月蝕衝檢日宿度所在
則其法善於劉歆之三統李梵之四分矣何承天之
元嘉祖冲之大明始知冬至宿度古今不同歲二微

差其法又善於前曆而至一行之大衍曆法最稱矣

購中國術書

肅宗朝崔錫鼎憂曆法叅差送許遠卒究其法監官
論賞及英宗元年新修時憲七政詢問大臣廣求諸
譯官安國獐卞重和來往天柱堂得日月食籌稿日
月交食表八線對數八線表對數闡微表日月五星
表律呂正義數理精蘊安命說金挺豪李箕興等購
納曆象考成後編十冊金泰瑞得清國新法曆象考
成後編一帙以納

英廟命雲監測黃赤道天度三百六十分秒俱折六十又定各宿交宮之度漢陽北極高三十七度三十九分一十五秒

起樓賜裘

成宗朝尹弼商奏祖宗朝金淡精曆法後無可繼者請擇文臣令習之舊時本監起樓二間為測候之所冬則賜狐裘今廢又請修葺

兼教授

英宗五十一年臺臣啓明之司天監後改欽天即敬天之意也請置文南官申晦曰凡事專委祿官無官

府體貌古有兼教授之窠可以兼帶

救食

正宗九年申命救食之規雖非親臨俾無褻慢之弊
令兵曹觀象監軍器寺考出可據文蹟

儀器

太祖七年置更漏于鍾街世宗命鄭麟趾造儀象曰
大小簡儀曰渾儀渾象曰懸珠天平定南仰釜日晷
曰日星定時儀曰自擊漏十五年刻新法天文圖二
十四年製測雨器李純之主之世祖親製窺衡命儒
臣觀之惟俞希益金紐等稍知梗槩成宗製窺標分

置喉院瀛館中廟朝李純得革象新書有觀天之咒
名曰目輪明宗製渾天儀宣廟三十四年命李恒福
製儀象拱進重修儀象序孝宗造璿璣玉衡顯宗命
崔攸之校正宋浚吉請依舜典註令李敏哲鑄渾儀
肅宗朝命李敏哲修顯宗朝舊渾儀景宗命製問辰
鍾英宗命安重泰修肅宗朝渾儀

大鍾

太祖三年定都漢陽乙亥鑄大鍾建閣通衢以懸之
晨昏嚴人民作息之限權近銘曰乃鑄厥鍾乃聲晨
昏我功我烈是勒是鑄鎮于神都於千萬年太宗懸

鍾于宮門嚴朝會之期卞季良銘曰有嚴晨夜維鍾
之懸百司效職罔敢或愆世祖二年置鍾于思政殿
前申叔舟撰銘在光化門外英廟戊辰建閣後破不
用七年鑄鍾韓繼禧撰銘在興仁門內英廟戊辰建
閣今懸光化門樓

鍾之變

西部興天寺中部元覺寺有大鍾及寺廢金安老欲
移置東南西門安老敗委棄草莽殆六十年壬辰光
化門鍾樓兩鍾被鑠還都後甲午懸南大門鍾以鳴
晨昏丁酉楊經理移于明禮洞峴上

分野

皇明分野書曰尾三度至斗二度析木之次也永平府尾分灤州尾箕分遼東都指揮司尾箕分朝鮮箕分唐書貞觀十九年月掩南斗太白入太微占者謂箕斗間漢津高麗地云世宗三十一年彗見燕分未幾英宗皇帝北狩世宗賓天

瑞葱臺

成宗朝有葱生于昌慶宮後苑一幹九枝時謂瑞葱後燕山時築臺于此號瑞葱臺今蕩春臺

淡婆姑

南蠻國有女人淡婆姑者患痰疾服南靈草得瘳故名之光海壬戌自倭國出張維最嗜吸婦翁金尚容白上請禁妖草後潘人自蒔潛賣一說元時有妓踏花仙者塚上所生使人悅之或名踏花鬼

太學銀杏樹不實

文廟前古人倣杏壇之制對植二文杏其實落地臭不堪近一泮官祭告于樹不復結子世以為異

繫馬樹

慶熙宮即元宗舊邸元宗潛邸時手植也有時繫馬故名後忽枯顯廟辛丑重榮是歲肅廟誕降景廟辛

丑又重榮而英廟陞儲正宗壬寅又重榮文孝世子
誕降

柿木有字

顯廟甲辰忠清道人劈柿木中有上下和木四字字
法洪武正韻而如墨寫翌年溫幸從官皆見之皆曰
和睦之兆兵使閔震益獨憂之曰黨論起上下紊亂
必至以木相打吾老不及見

嘉穀

世宗朝京畿進麥穗四歧世祖朝嶺南進嘉禾三穗
宣廟朝堤川產麥五歧者三本四歧者五本三歧者

六本兩歧者甚多仁祖朝驪州麥秀兩歧肅宗朝嶺南進麥穗四五歧英廟朝進麥穗三歧並却之

追錄佐命勲

太宗朝大內有猛帝猝犯御座左領護軍金德生在百步外急抽腰間矢一發即斃上大驚喜追錄三等勲翌日臺諫以向御座發矢請罪德生供曰射藝萬全故敢為發矢請盡帝試之百矢無虛發然既允臺啓竟就刑世宗朝伸雪錫以田民

鎮江神馬

孝廟自瀋還清太祖出給一馬曰此是東國鎮江場

所出孝廟受其馬而還將渡江馬先飛涉不知去處
始知為神種

濶口瓶

曹伸曰高麗所用銀瓶名曰濶口象我國地形云今未
見濶口之制蓋我國地勢狹而長王都南距長興九百
七十五里北距江界一千三百三十里東北距慶興
二千三百五十里西南距珍島九百里西北距義州
一千一百四十里東南距蔚山九百里東距寧海五
百四十里西距高陽三十里則可知濶口之橢形也

北漢

肅宗朝北漢設築後有積城交河合設一邑於山城之議趙泰耆力主其論領議政徐宗綦議曰城內既有民戶則必有近民之守令然後可以撻察凡百而但以積城罷屬楊州以楊州高陽若干面割屬於此則田賦民戶何能成都邑貌樣乎事遂寢

廢四郡議

虞芮間延茂昌慈城乃廢四郡也肅宗九年南九萬請廢四郡設置四鎮柳尚運言不便曰此地橫亘數百里樹木叢雜道路阻絕不足以禦敵貂參之利絕矣亦難設烽燧九萬曰北路貂參出於三甲設邑屢

百年其利不絕今雖置四郡豈至一朝斷絕乎江邊
往來之路非一二則賊來豈必由四郡乎樹木雖可
為防蔽而亦豈如募八人民乎諸臣多以尚運言為
便領相金壽恒請令九萬往議諸大臣金錫胄主尚
運議以為先置二僉使觀勢加設為可閔鼎重主九
萬議以為不可不設四鎮金壽恒金壽興從錫胄言
以先設二鎮為便命設茂昌慈城二鎮尋罷慈城曾
屬江界膏腴之地也為江界後門與義州鼎足而峙
昔梁誠之上閤延茂昌虞芮三邑地圖曰今罷江邊
三邑慈城一郡獨當野人賊要衝己卯革慈城而移

其民於上土滿浦今上甲子後罷上土為慈城郡關
北厚州地屬於江界左寨為厚昌郡管於關西上土
之為慈城江界之分也厚昌之隸關西別無關於北
道猶為厚州之幸也

均疆之議

世祖元年諭八道可割之地商度以聞具致寬議忠
清全羅慶尚三道疆界不正宜割大並小以就其中
韓明澮曰州郡錯置得大小相維之制况畫野已久
一朝變更民必騷擾議遂寢

王后本貫邑不降

李恒福議曰王后本貫雖有變不降與否臣未諳故典今不敢知設或有之以意料之必出於一時之特命凡此等事本出於缺城耻民之遺意在有司之體只可依法請降

監司兼帶牧府不降

英宗朝金在魯言監兵使兼帶之牧府依故例不得降號事定奪時鏡城因罪人胎邑有降號之議也按高麗仁宗時議降州為郡門下省奏曰禮云邦定公時毀其室洿其宮而止耳降州為郡非古法也

山之宗十二

一曰三角為京都之鎮二曰白頭山海經曰不咸山

唐書曰太白山三曰圓山關北之端川利城北青洪
原咸興三水吉州明川六鎮關西之江界廢四郡諸
山原此四曰狼林關北之定平永興高原關西之寧
遠孟山殷山成川江東三登陽德諸山原此五曰豆
流關北之安邊嶺東之伊川西境海西之谷山東境
諸山原此六曰分水關北之安邊嶺東之歙谷通川
淮陽高城關東之伊川平康鐵原安炭金城金化狼
川畿北之朔寧漣川永平加平抱川楊州高陽諸山
原此七曰金剛關東之楊口麟蹄杆城襄陽諸山原
此八曰五臺關東之江陵三陟旌善寧越春川洪川

平昌原州橫城湖西之堤川畿輔之砥平楊根諸山
原此九曰太白嶺南之奉化禮安安東榮川順興豐
基醴泉龍宮聞慶咸昌英陽寧海盈德真寶東萊嶺
東之蔚珍平海湖西之永春丹陽清風忠州延豐諸
山原此十曰俗離嶺南之尚州金山開寧善山知禮
高靈星州陝川居昌山清三嘉宜寧晉州草溪湖西
之黃澗永同報恩青山懷仁文義清州清安槐山陰
城湖南之茂朱諸山原此十一曰長安嶺南之安義
咸陽湖南之雲峯長水南原任實諸山原此十二曰
智異湖南之求禮嶺南之丹城河東昆陽泗川固城

咸安鎮海昌原柒原熊川金海諸山原此

水之宗十二

一曰漢江之源三一出江陵五臺之于筒一出淮陽
金剛之萬瀑洞一出報恩俗離之文藏臺達川江自
文藏臺西流為福泉北至于忠州經團月之西北與
漢江會新淵江自萬瀑洞西南流為鳴淵合洪川江
過窟雲川南流為龍津會于漢江臨津江源出文川
之蘆嶺南至永豐古縣過沙川至鰲頭與漢江會于
祖江五臺雪嶽金剛以西鐵嶺分水雙嶺雲嶽佛谷曰
龍以南大關百福太白以西鳥竹俗離以北皮盤上黨七賢

白雲光教修理安南文殊以東京都諸水入此二曰禮
成江源出遂安之彥真山南流為黑石灘過成川至
彌羅山東方浦為碧瀾渡秀龍聖居天磨以西葱秀
滅惡雲達以東諸山之水入此三曰大津之源三一
出陽智之曲頓峴一出青陽之白月山一出公州之
車嶺頓串津自白月北經黎陽至王子山過昇仙川
北入于行擔島與貢津會彌勒川自車嶺東北經德
坪鄉過溫井川為丹浦至八堂西與頓串津會光教
聖倫以南七賢聖居以西車嶺角屹獅子烏棲伽倻
以北諸山之水入此四曰錦江源出長水之水分峙

西流至龍巖為松灘至沃川經江景過沃溝為龍塘
津長安聖壽馬耳珠翠以北上黨皮盤黃岳大德以
西望夷車嶺角屹以南諸山之水入此五曰沙湖源
出潭陽之龍泉山南流為原栗川過鵲川西南為曲
江駐龍浦內巖白巖秋月龍泉以南玉泉無等中條
呂岵以西半登鷺嶺佛岬君尼以東華嶽德龍雙溪
月出以北諸山之水入此六曰蟾江源出鎮安之馬
耳中臺及全州之熊峙過雙溪之水瀦為龍淵南流
斗赤江聖壽馬耳掃峙毋嶽以南內巖金城雪山無
等以東億佛舟越兜率白雲以北長安女院走峙智

異以西諸山之水入此七曰洛東江源出安東太白山之黃池穿山而流故名穿川徑天淵臺為濯纓潭過伽倻川為朴津與晉江會過孤浦為月堂津播為三义河琴湖江源出青松之普賢山徑河濱古縣西與洛東江會黃茆江源出茂朱德裕山之佛影峯至陝川過澄心川入鎮川至玄倉與洛東江會小白鳥竹嶺以南俗離黃嶽大德德裕長安智異以東高草白巖驚棲九龍圓窠以西諸山之水入此八曰大同江源出寧遠內樂林之白山過金川與沸流江會過合掌浦為銀灘能成江源出豆流山過文浦川與

大同江會于馬灘月唐江源出瑞興熊坡山之釜淵
過迎津為鐵和江北與大同江會于急水門釳山馬
踰鐵甕吳江花餘載靈以西樂林廣城柱川謁日姑
射以南德業彥真滅惡首陽達摩以北九月以東諸
山之水入此九曰清川江源出江界之甲峴過文川
至古城津為老江大寧江源出義州之天摩山至海
望隅東與清川江會于老江甲峴狄踰狗峴牛峙九
階防牆以南天摩青龍吉祥以東樂林廣城柱川以
西杳山謁日姑射馬頭到雲以北諸山之水入此十
曰龍興江源出永興之鐵甕山過沸流川為濟仁浦

南至末應島馬踰嶺鐵甕吳江花餘載靈以東諸山
之水入此十一曰鴨綠江源出白頭山之大澤伏流
而南為惠山江經清城方山玉江之堡水口之鎮至
義州府於赤島東分三派一南流為九龍淵此則鴨
綠江以水色似鴨綠故名之一西流為西江一從中
流名小西江至黔同島復合為一白頭以南圓山以
西厚致黃草嶺罕狄踰牛峴防牆天麼蘆洞望日以
北諸山之水入此十二曰豆滿江源出白頭山之陽
甲山至慶興府經赤池為愁濱江又東流經造山至
鹿屯島白頭以東圓山長白茂山之嶺松真白嶽以

北諸山之水八此

三角山

山一名華山一名負兒岳溫祚登岳相可居之地即此也有白雲國望仁壽三峯故名三角

追慕峴

英宗四十五年明陵之役上親臨茲峴瞻望名曰追慕峴有御題

追慕洞

英宗辛巳上幸盤松坊車洞仁顯王后誕生舊第立碑命其洞曰追慕洞

濬川

世宗朝儒臣李賢老以風水之說請於都內川渠禁
投穢物以清明堂之水校理魚孝瞻言都邑之地自
當有積聚之物不可以風水之說用於國都自是三
百年䟽濬不以為慮值霖潦汎濫英廟用耿亳故事
臨門發策多言濬之為便庚辰命李昌誼等與諸將
臣監董坊民赴役三日民喜之或出屢百丁不日訖
工首尾五十七日役民二十萬丁錢三萬五千緡米
二千三百石竣事建濬川司成節目

地脉

李晔光曰我國諸山皆發源於白頭山自磨天鐵嶺而南為金剛五臺太白至智異而盡焉南師古常言白頭山脉不應到此而止當是隱伏海中為日本諸島云其說有理今濟州漢拏山亦其一也

金剛山

李穀曰此山名聞天下雖遠如乾竺之人時有來觀者大凡所見不如所聞東人游西蜀峨嵋南越普陀者皆言不如所聞余見此山實踰所聞雖畫師之巧不能得其形容之髣髴也權近曰金剛山在本國東海上其形勝冠絕天下故其名聞天下嘗聞天下之

人無不願其來觀而歎莫之得至有垂其圖而禮之者云李晬光曰世謂三山乃在我國以金剛為蓬萊智異為方丈漢挈為瀛洲以杜詩方丈三韓外證之余謂三神山之說出於徐福八日本死而為神則三山應在東海之東矣老杜不曰方丈在三韓而曰方丈三韓外則其言宜可信也

五臺山水比楊子江

權近曰五臺山西臺之下有檻泉湧出色味勝常曰于筒水西流數百里為漢江漢受衆流之聚而于筒為中派若中國之有楊子江

鏡浦臺

忠肅王丙寅存撫使朴叔正曰余登是臺遠近山水
四顧森羅水之遠者滄溟浩瀚而烟浪崢嶸近則鏡
浦澄清風漪溶漾山之遠者洞壑千重而雲霞縹緲
近則峯巒十里草樹青葱常有沙鷗水鳥浮沉往來
容與于臺前其春秋烟月朝暮晴陰隨時氣象變化不
常此臺之大率也

三日浦

前人三日浦記曰浦在高城北七八里外有重峯疊
嶂合包而內有三十六峯洞壑清幽松石奇古水中

有小島蒼石盤陀昔四仙游此而三日不返故得是
名水南有小峯峯上有石龕之北崖石面有丹書八
字曰永郎徒南石行小島按一權貴家葬垆於下水
勢漲滿所謂三十六峯見者無幾丹書八字湮沒水
中污穢名山孰有過於此者哉

太宗臺

原州雉嶽山上峯曰毗盧南有駐蹕臺太宗元年訪
前朝進士元天錫于耘谷天錫避之上追至是山不
及名其臺曰太宗臺

白頭山

一統志云在故會寧府南六十里橫亘千里高二百
里上有潭周八十里南流為鴨綠江北流為混同江
東流為阿也苦江洪世恭記曰肅宗三十八年烏喇
總管穆克登來白頭山定界我國遣按伴使朴權咸
鏡監司李善溥往遇克登於三水府之蓮困克登與
譯官金應憲金慶門登韓德立支當山皆純骨色蒼
白一峯挾天即小白山也陟其上脊望見白頭山雄
峙千里一蒼頂如覆白甕于高俎從嶺底行數里山
皆童濯忽中陷成塹橫如帶深無底廣僅二尺山頂
有池如顛穴周可二三十里深不可測四壁削立若

潮丹埴圻其北數尺水溢出為黑龍江有石獅色黃
尾鬣欲動中國人謂望天吼矣圻為汶水名分水嶺
遂勒石為記歸後移文曰立石後從土門源審視流
至數十里不見水痕從石縫暗流至百里方現巨水
此無水之處如何使人知有界不敢相犯我國以土
門源斷處築土聚石或樹柵以接下流之意中復云

龍灣駐蹕

宣祖二十五年駕幸龍灣時公辭不能容坤殿御于
南門內裴福家福進木麴又以川魚日供上嘉其誠
意招福問其所願福惶感不能對遂以南山一區賜

之有射場屯田駐蹕時使扈從諸臣分掌射場里屯
田居民至今稱判書卦叅判卦叅議卦

鴨綠江

類纂云天下大水有三一曰黃河一曰長江一曰鴨
綠又曰黃河與鴨綠夾北幹龍流於遼海以此觀之
所謂鴨綠似是發源於中國之西北而東流入於遼
海與黃河同也且我國鴨綠其大不可比並於黃河
長江則恐非類纂中所謂鴨綠而朱子嘗論三大水
有曰女真起處有鴨綠此即我國鴨綠江也

威化島

島在灣府西二十五里沃饒民多耕墾高麗時農民
為建州野人所虜禁民耕墾辛禡謀攻遼陽我太祖
將左右軍渡鴨綠江屯此島霖潦數日水不漲及旋
師纔渡岫大水驟至全島墊没人皆異之

妙香山

山在寧邊世傳檀君所降處以香檀多生故今名妙
香山勢高大蟠據四百餘里古記云山有三百六十
菴高麗高宗時金山兵奔此山燒普賢寺官兵追擊
之斬獲二千四百餘賊將只奴中箭死

薛列罕嶺

嶺在江界府東南三百六十里一作雪寒嶺高麗恭
愍王以我太祖為東北面元帥擊東寧府太祖率騎
兵五千步兵一萬踰黃草嶺六百餘里至此嶺

鳳林

北數在清州西五里孝宗潛邸時命名鳳林

椒井

井在清州東三十九里其味如椒而冷浴則已疾世
宗世祖嘗幸于此

俗離山

山在報恩東四十里三道之交新羅稱俗離嶽躋中

祀山勢雄大上皆石峯聳列雲霄望如玉芙蓉俗號
小金剛山頂有文巖臺疊石天成上有石坎如鑊中
有水混混雨旱不盈縮分三派注下東流入洛東江
南流入錦江西流北入達川南有天王峯與文巖相
對山多名刹遊賞至

溫泉幸行

行宮在溫陽西七里太祖世宗世祖顯宗肅宗英宗
皆幸于此

無等山

山在光州東十里雄蟠百餘里上有石柱數十如削

成高可百尺皆出六隅又有石壁長可數十武高可
數十丈石紋如波如雲赤白色相雜又有天作石室
山名瑞石以此每天旱欲雨與久雨欲晴輒鳴聲聞
數十里俗樂有無等山曲

湖西四郡

清風錦屏山花楓之辰隔江相望粲然若錦帳上有
風穴惶恐灘上下兩灘水底皆盤石而有石穿如釜
數三處遇旱祈雨丹陽玉筍峯四五石峯抽發如玉
筍丹丘炭兩岸對峙一江中注峻拔澄渌上中下三
仙巖窈窕清竒島潭三石矗立潭心龜潭石峯浸水

形如龜永春城山有窟高一丈餘廣可十餘尺深八
無際有水混混而出清冷如冰持炬十柄而入穴猶
未竟堤川龍頭山頂有池九鶴山有月影臺又義林
池世宗朝命鄭麟趾儲水而導之堤如天作深不可
測此其尤者也

月出山

山在靈巖一名小金剛石峯挺秀森列望若削玉頂
有九井巖高二丈傍有一穴從其穴而上其巔可坐
數十人其平處有凹貯水如盆者九峯下有三大石
名曰動石列在巖上其高丈餘周十四圍東臨絕壁

其大雖用千百人似不得動而一人搖之則動郡之名靈巖以此

漢拏山

山在濟州南二十里以其雲漢可攀而拏也故名峯頭皆平圓有池似釜又名釜山俗稱釜為頭無故名頭無峻極于天雄據數百里山巔有池經數百步曰白鹿潭白鹿羣遊於此由大靜縣有一鳥道登其絕頂可觀南極老人星云世以此山為三神山之一即瀛洲也

智異山

山在雲峯東六十里西北有山曰鼎山高麗末倭寇
咸陽踰八良嶺攻南原山城我太祖踰雲峯距敵至
荒山見有險徑因誘倭三遇鏖戰賊將有年可十五
六者驍勇無比舞樂馳突稱阿只拔都身披堅甲又
帶銅面無隙可射太祖約李豆蘭乃射中兜牟頂子
兜牟遂落即射殺之南原及求禮晉州咸陽山清丹
城河東皆在此山之下

南方最大山

南方諸山之最大者曰智異一名頭流據慶尚全羅
二道之交南臨大海有十二洞天雙溪佛日臺青鶴

洞花開洞德山洞白雲洞桃花洞俱名勝也其上峯
曰天王登臨則二道諸山南海諸島皆在眼底世稱
海東三神山此即方丈也

晉江得印

江在晉州一名蠡石又名菁川英宗二十三年得古
印於江中篆刻慶尚右道兵使印背刻萬曆十年造
即癸巳城陷時右兵使崔慶會抱印投江者也上聞
而感之親製序銘並印納于銅匣命藏於本營

伽倻山

山在冶爐廢縣北三十里今陝川西逆為月留峯有

海印寺新羅哀莊王所創建使入唐購八萬大藏經
以舶載來建閣百二十間藏度至今板如新刻山南
有紅流洞洞口有武陵橋書巖棋閣崔致遠棲隱之
所云

北廢四郡故事

高麗時安邊以北為女真所占政令不及我太祖受命
使李豆蘭招安野人酋長至移蘭豆滿皆來服事俾
劍入衛如女真幹朶豆漫夾溫孟哥帖木兒等兀良
哈則土門拈兒牙戶兒逸嫌真等兀狄哈則速平江
南突阿刺哈伯顏濶兒看等是也披髮之俗盡襲冠

帶習禮義之教自孔州北至于甲山設邑置鎮皆入
版籍今廢已久而與彼地只隔一帶此誠不可不慮
也

域內道里

我國地形亥甲已向穩城正北距京二千一百二里
海南正南距京八百九十六里寧海正東距京七百
四十五里豐川正西距京五百五十五里南北二千
九百九十八里東西一千三百里

都城

太祖五年發民丁二十萬等之平壤伯趙浚監役柳

觀上定都論畧曰古今所都不越乎關中洛陽況我國四境之內不過萬里可都之地豈能多有惟松都與漢陽善之善者也去年春定都鷄龍民咸憂之以形勢險隘而土地污下道里不均而水路污遠也今之遷漢陽也民咸喜之漢陽形勢土地道里水路與松都相似以民心觀之則漢陽誠殿下天命之所都也成俛曰太祖開國有移都之議先相地于鷄龍之南審察京邑規模未幾而止更定鼎于漢陽三角山西延曙驛坪則為美壤後更相之皆山外背走之勢不如白岳之南木覓之北為帝王萬年之地與天無

極矣諺傳松京山谷環抱有包藏之勢故世多權臣
跋扈者漢陽西北高而東西下故長子為輕支子為
重云

都京備五德

權近曰神誌秘說以秤喻三京三角山南為五德邱
喻秤錘五德者中有面岳圓形土德北有紺岳曲形
水德南有冠岳尖形火德東有楊州南行山直形木
德西有樹州北岳方形金德

仁王洞丹書

道誥秘記西有孔巖又有丹書石壁孔巖則二地皆

在西須覓丹書可決乃得丹書於仁王洞石上遂決
意達都

改籌

世宗三年因上皇意改籌石城周九千九百七十五
步高四十尺

遷都議

光海二年李恒福交河置京議曰古之遷都非無故
而為之周衛之避難晉邢之為民盤庚之避水害周
公為朝聘而或傳漢京氣竭此係望氣者說非全出
於山家則吾東亦有望氣之術耶術窮而移家避方

僥倖於冥冥萬一之中轉徙不已鼎缺瓢亡困窘益甚此足為鑑矣臣之愚計姑盡人事大戒於國修德勤政然而國逾弱民益怨然後別議以啗可也史臣曰交河置京之議自是當時大議論而若無李恒福此議則不惑左道終不至遷都亦不可必謹為收錄俾作後日之鑑戒

南小門開閉之論

肅宗三年金錫胄劄曰南小門舊有而今廢堪輿家言少陽方閉而不開故國家於麟趾螽斯之慶每女子多而男子少今若尋其舊趾以通少陽之氣則宜

有吉祥而金安老之擅閉云者無明白考據之實也

北漢籌城議

肅宗三十年申琬啓曰北城旣極險阻且是都城只尺之地若於緩急之際大駕駐蹕都城士民同力堅守則雖動天下之兵決難盡圍亦無攻拔之勢真所謂金城而論議不一舉皆沮戲李奮曰我國保障之地有江都南漢而若有海寇則大駕難入江都南漢山勢雖云單薄實是天險亦足為避兵之所至於北城之計臣意與首相稍有不同都城雖曰闊大北城周圍比都城加五里云地勢險阻勝於都城亦不可

謂不闕若以新築北城之力增修都城則似可易就而都城乃廟社所在士民所就與民共守各使護其父兄保其妻子則孰不欲盡心死守乎申琬曰以險阻而言則北城為勝故臣曾主北城之議而都城則宗社在此臣民在此此誠一國根本之地既不能等北城則無寧等此以為根本之計耳李畬曰綢繆之策不可但恃海防故宜先定陸兵壯固根本堅守勿去實為長策北城雖云險固若以都城與賊而縮入北城則與賊蔽隔一城門能使人心堅固實不敢必也奉君父棄都城入北城實非萬全之計也庚寅遣

將臣李基夏金錫衍往審北漢籌城便宜錫衍曰宣
廟名臣李德馨以為都城至近之地有如此形勢而
棄置可惜臣意決不可棄也又因北咨以海賊為慮
上亦留意辛卯四月始籌九月訖役壬辰四月車駕
幸行歎其天作之險周七十六百二十步

加籌都城之議

肅宗三十八年有都城加籌之論崔錫鼎啓曰必審
其當守不當守然後論其可籌不可籌也傳曰諸侯
有道守在四境而不在國內也封疆之臣若得其人
則雖強寇勁敵不至於王都守城之道愈小愈堅未

聞四十里為城而能守者也是則不可守之形也國俗善驚不能持固無鎮定之理此不可守之勢也

南漢等城

仁祖四年城南漢山仍設守禦廳兼提廣州等鎮南漢山一名日長山本百濟溫祚王所等也距京都四十里天作保障迺變之後李元翼李貴請等城遂命李曙掌其事用度帖攝僧徒設行宮丙寅置守禦使管山城兼領圻左諸郡兵以廣州田二千餘結屬之山城城周六千二百九十七步汗峯在東門外丁丑後以大臣為上使又置副使皆在京勾管甲申沈器

遠以兼使謀逆後遂罷大臣兼上使之規孝宗壬辰
以廣州府尹兼副使肅宗癸亥朝議以廣州既屬本
廳而又有府尹甲兵財賦事權分貳大臣金壽恒李
尚真建白移京廳改為留守庚午還罷英宗庚午又
命出鎮山城兼京畿三鎮兵馬節度使己卯以守禦
即五營之一而以見帶留居之故遞易頗數民受其
病命依摠營例去其留守節度之號仍前還住于京
廳

江都

鎮以摩尼穴口阻以童津昇天四面環海土疆沃美

島嶼羅絡三面都會京師咽喉周圍五萬五千三百六十五把內一萬六千把為山浦不等之地其餘二萬六千九百七十五把為古土等基一萬二千三百九十把為古石等基高麗高宗等外城及中城二十九百六十間我肅宗朝等墩臺四十八坐孝宗四年士人金石堅請置安興鎮為江都外援肅宗四年金錫胄以師旅樵蘇為重取莞島邊山松子擇其山阜不食之地遍耕而種之肅宗十年進江都地圖等城南音島上設雉堞多置火器不甚費力而江都大固又等文殊城為乘便渡江之計十八年睦來善啓江

華土城未築處自鵠巖至寅火堡為一萬四千四百
五步里數則四十里五步其間山上只築女牆處二
千八百二十六步平地築城處一萬一千二百七步
平岸斗起不費功力而當築城處三百七十二步留
守每等六里二百四十一步式可以分築以此計之
六留守等內可以完築乃以江都軍丁有難獨當發
用僧軍而三軍門同力始役又命李寅燁閔鎮遠為
三營堂上交替往來以為終始完役元景夏啓曰沁
都城濱海而甌築者五十里年年潦雨水潰堞崩徒
費財力今依耽羅之枳柵王式之芳柵導海岸而種

枳樹起於月串訖於昇天堡未踰六七年可立二百里隱然為匪石匪甃之一長城矣按古者沁都路四圍皆是沮洳舡不得泊等城塞浦後因作平陸近日洋舶來侵亶由於是至丙寅城陷而極矣今有養兵之論戒嚴洋賊之窺也

臨津長山設置

英宗四十年洪鳳漢劄曰臨津長山之設置城墩旣出於聖意之獨斷而今加設數處墩臺又為長養樹木則脫有緩急庶幾得力而所可慮者只是防守一款尚未有定計按昔梁誠之曰原平據臨津之險又

可挈交河提豐德扼倭寇於海口矣

禿城山城

李廷龜禿城山城記城居廣野之中無險阨之阻有山斗起於道傍又無樹木望之童童然故名禿城人視之尋常不以為奇壬辰倭寇大至都元帥權慄轉鬪入據于茲屢却賊兵於是人知茲城之得形便為國中要衝也

大興山城

山在天摩聖居兩山間正宗丙辰等城周五十九百九十七步堞一千五百三十北門在朴淵上南門在

土峴將臺在龍泉寺上其下有中軍營東門在迦葉
峯外西門在定光峯小西門在萬景臺外初置別將
留鎮辛未以留守為大將後兼管理使中軍兼別將
設牙兵十哨屬九邑出身癸巳本府諸色軍兵專屬
本府罷他邑牙兵凡百勾管措置一如江都南漢

青石洞

青石洞條曰在府西北三十里天摩西支聖居北支
相對峻壁削立自西關走京城之大路緣崖傍壁堇
通人馬盤旋偏側二十里南北兩口俱隘而北口尤
窄兩崖間不滿三百步自昔稱天下之至險中國并

陁殆不如也今宜設一關於北口團東居民置別將以守受節制於松都龍峴在洞西路平闊遵江而下直通臨津北路不遮雖守青石亦無益或等行城以守或多樹林木以防賊路按純祖朝設鎮旋罷哲宗朝有復設之議還寢甲子後設鎮移置大興中軍於此蓋丙子後携貳之論尚今未定

雙樹山城

古名公山城在北三里甲子李适之變仁祖駐蹕于城內雙樹下故因以名焉以石等之周二千四百四步高三丈九尺塼八百五砵樓十有南北二門東北

間水口門外鑿一池等外城有紀蹟碑李元翼撰南
九萬書

忠州為漢水上流

京城以漢水為固然若忠州有失則賊從上流而下
如屋上建瓴不可防遏若忠州得全則賊雖來而當
從下流其勢稍緩矣忠州之重蓋與京城相等鎮管
之人必宜察擇而任之

南海防

南海之戍自東萊南乃浦至光陽向西乍轉而南自
順天之西至海南向西南斜迤以行其地之濶入海

曲者東萊則多大沒雲臺也熊川則安骨新門也漆
原則龜山也固城則統營及所非浦也晉州則末文
也昆陽則露梁及西面也順天則在水營古突山也
興陽則全縣及鉢浦蛇島鹿島也長興則會寧浦也
靈巖則葛頭也海南則於蘭也

對馬島之始

島中男子言語婦女衣服多類我國其稱倭必曰日
本日本人待之亦異內地民亦未嘗以倭人自處外
公以本島人仕于新羅可見其為我地新羅本記實
聖王戊申倭置營於對馬島若本係倭地則其置營

不必在羅史也我太祖五年遣金士衡南在征之世
宗朝遣李從茂征之世祖朝宣旨喻曰都都熊尾之
父貞茂慕義輸誠故每接信使厚加勞慰又許通商
船慶尚道之米粟所費歲平數萬石予之用心良亦
勤矣若其不降當大備兵船環島而攻之中宗五年
黃衡因三浦之捷謂此島本我舊地仍欲進據朝廷
不許備局謄錄曰對馬島首接釜山尾對巨濟等地
隨風緊緩或泊嶺南或泊湖南何嘗有常處也以壬
辰年始下釜山故專以釜山為受敵之常處乙卯之
鹿島靈巖何為南寇落帆之所耶

絕影島路

鄭誥疏曰水營釜山兩鎮之前有此島太僕放馬之場也距水營三四里外面絕險中實土沃倭船之指向釜山者必由島右指向水營者必由島左實為賊路之咽喉今宜撤去牧場設置一鎮養兵藏船牧民作農以待緩急則雖賊船千艘勢不能捨此島而經由他路必先進犯此島俾無後顧而後可以前泊水營釜山而與此島相持之際水營釜山諸鎮戰船招集軍兵整理器械以為內外相應之勢則賊船必無如前若入虛境之虞且島中之民四五百戶近千精

兵長在島中四面環海自無逃散之憂父母妻子皆在島中人懷固志皆思死戰矣

欲智島還屬統營

肅宗二十六年統營欲智島為王子宫批受馳啓防塞上不許申汝哲䟽曰臣曾任此地備諳形勢統營若失此島則船材何以取用什物何以維持是無統營也無海防也徐文重亦以為言乃命還屬統營仍以關防緊要之地自今勿以批受事定式

左右水營移議

李恒福啓曰前在湖南詢諸邊帥之老於南邊者其

言當移者左水營前洋廣濶且多淺嶼不得蔽船營
迫在巨濟一隅與馬島盈盈一水之相望孤軍弱卒
塊處一邊賊若來襲坐以就縛一若不利遠近震駭
且土品磽确民生極難平時則水軍入防受價代立
不如移設海平場以為留營之所風和則水使整船
入防於舊水營如行營其不當移者右水營政當巨
濟外面水營一移是撤巨濟之外藩也巨濟危則邊
上之勢虛矣不如仍舊長防二說俱有理抗衷為難
仍移之間利害所存不可不詳審

西海之南

西海之崑南自海南鳴洋西至扶安向北自萬頃至
瑞山北拖自瑞山東轉至洪州之大津自水原向北
至通津祖江之南地之深入海曲者海南之石水營
登山串靈光之聖雲務安之海際洪州之興陽恭安
全郡及郡之安興梁南北二面瑞山之大山串也

耽羅路程

高麗地志凡往耽羅者發羅州歷務安大掘浦靈巖
大無只尾島海南於蘭梁七晝夜方至楸子島發海
南則從三寸浦歷巨安梁三內島發康津則從軍營
浦歷高子黃伊露瑟島三內島皆三晝夜至楸子島

右三處舟船皆經楸子島過斜鼠島大小火脫島至
於涯月浦朝天館火脫之間二水交流波濤洶湧往
來者難之

安興鎮

肅宗元年備局啓曰安興地勢凸入於海中四十餘
里三南船隻若不由於此則更無他路帆風一日可
達江都水路之咽喉江都之門戶舊有彈丸破城即
僉使之所居也癸巳年間經營新鎮李厚源以為不
如舊鎮修葺之為便八月始役十月功訖地形高峻
城小而堅潮至則成海潮退則成陸敵若乘船來攻

則有成陸船閣之慮由陸爭戰則有潮至難久之勢
其所受敵只在半日城中有井三處城外有井數處
今海防之事有異前日泰安郡守以武弁極擇差出
兼安興鎮防禦使專掌守護按甲子後泰安因作防
禦營

江都所屬關防

文殊山城在通津北十里即比兒山也臨甲串津邊
俯視江都砲火相及人聲相聞議者為欲固江都當
先守此山正宗甲戌命京軍等之周五千五百二十
九步西南北有門中設軍倉本府之兵專屬於城北

有喬桐本高勾麗高木根縣仁祖己巳移水營于此
又兼三道統禦使設營於月串鎮城處於要衝之地
末島在黃海道境大洋中自末島距南音島五里自
南音距西檢島十里自西檢距彌法島十里自彌法
距席毛老島十里自席毛老島距本府三巖墩十里
賊若自海西入則諸島次次報砲賊在四十里外營
門先知而預備海州延平島在末島相望之地自末
島相距二十里賊入延平則江都已知之長峯注文
兩島在西南海中賊船之自西來者由內洋則出於
喬桐末島之間自南來者由內洋則出於永宗信島

之間若由外洋則毋論自西自南皆出於長峯注文
之間此兩島為要衝之地故革罷前日之牧場差出
別將募入人民俾盡防守

西海之北

西海之岸北自義州彌羅山之南向東至安州之老
江自老江之南向西南斜拖至長淵自長淵折向東
南至康翎康翎與白川相值而少北為白川自白川
向東渡碧瀾渡斜拖東南至于豐德祖江之北地之
溪入海曲者長淵之長山串海州之墨頭甕津之底
作康翎之登山串也

椴島

島在鐵山府南四十七里周四十一里方言呼椴木
為皮木又名皮島光海十三年鎮江城既陷軍門標
下毛文龍浮海到龍川地招集遼民夜襲鎮江城斬
降將佟養正留屯鐵山宣川間仁祖元年中朝授文
龍總兵都督先是兵部議文龍寄跡朝鮮或可乘虛
勦敵故有是命文龍遂開府于椴島號東江鎮遼民
來歸者前後數十萬島中不能容分處于蛇浦等處
帝勅監軍梁之垣領兵四千來令朝鮮協同毛文龍
恢復遼瀋兵竟不出癸巳文龍偽奏滿浦昌城之捷

甲子文龍設鎮于宣川身彌島號雲從島大刻雲從
島三字於石上分置其衆自登州船運糧餉金帛不
可勝計丙寅文龍徵索糧貨不得露奏詆誣本國本
國遣使陳辨丁卯毛兵出陸作亂攻陷碧潼諸堡寇
掠子女財物又募漢人斬朝鮮人被俘逃歸者三四
十櫛以賊級奏捷中朝時本國官軍士女多被殺死
清北生民死三畧盡屢咨毛營請禁斷不從又誣奏
朝鮮携貳本國遣使陳辨已巳遼廣經畧袁崇煥會
文龍于寧遠前洋以其通敵國便宜誅之移咨本國
數其罪遊擊陳繼盛代領其衆初劉興祚與其弟興

治自北亡歸毛鎮興祚赴寧遠戰死興治與繼盛不
協庚午作亂攻殺繼盛據有島衆奉國乃遣李曙鄭
忠信等得舟師伐之興治刼其衆入登洋島詐稱受
勅領島衆移咨送款是時島中有馬姓人居窟中隆
冬不寒食木實言多神驗一日乘舟避去未幾有興
治之亂今名其窟為馬神仙窟

白翎鎮朔設

李恒福啓曰白翎島在西大洋海賊之作耗我國者
潛泊此島樵於斯汲於斯候風於斯始入內洋發於
海西得正西風向南而下轉入忠清全羅則此乃賊

入之門闌其為周迴三日乃盡有兩港列鋪煮鹽其
用無窮土極肥饒中陷而高設墩相望無碍東連江
都西對椒島北對長山串廣巖阿郎兩鎮隱在重浦
之內與外洋聲勢窅合此兩鎮作大鎮添助他郡
為堂上僉使鎮以聲威長淵吾又浦甕津所江等處
去本島最近宜此一處設烽相準以備非常

西南海路

自京都龍山江西抵通津留島百里自留島南行過
甲串津至孫石項項在江華府吳方故名吳石項江
華山脉自孫石項入浦中來水底石角嶙峋波濤洄

次艍路極險左夾藥山帝島右夾德津鎮草芝鎮左
夾栗島永宗島至月尾島自留島至此島一百三十
里自茂致島左夾至平薪鎮二百三十里右夾至呂
防島二百五十里左夾安興鎮竹島倍味島自平薪
鎮至此四百五十里右行至羣山鎮自呂防島至此
四百六十里左夾自倍味島至烏驛島二百九十里
自羣山鎮右夾至注之島二百九十里左夾歷暮來
草右抱楸子島左夾會寧鎮歷全羅左水營至非浦
鎮五百二十里左夾統營艍廠所歷巨濟閑山島右
抱加德鎮左夾至鳴旨島四百餘里右夾絕影島倭

館對馬島左夾釜山鎮轉向北過慶尚左水營機張
蔚山長鬐迎日至于嶺東關北自留島至喬桐歷延
坪島左夾身彌島至椴島自身彌至椴島七十里

中國相通海路

三韓直趨四明而海道渺瀕中隔州島又有黑風海
動之變委曲避就出禮成江急水門至羣山島始謂
平達非數十日不至也宋高宗建炎二年楊應枕自
請使高麗其回也九月癸未發三韓戊子至明州之
昌國縣僅六日耳端拱四年陳請使高麗自登州東
牟順風泛海再宿抵甌津口登陸行百六十里至海

州又行百里至閩州又行四十里至白州又行四十里至其都開城

沿海亭館

百濟於樸郡之加里渚東置水軍倉樸郡今汚川新羅平百濟復置倉於樸山東彌棕館唐之使价商賈皆就館羅人朝貢亦由此豈川椒島廣石山下有唐館古基世傳中國使臣渡海往來之路高麗時宋都在汴故使行抵登州登陸帝詔登州置館以接待保寧縣西高靈島館中朝使命往來之亭宋欽宗登極時金富弼充賀使乘舟之處皆有亭登州諸處是也

海美安興亭洪州荊盆島仁川紫燕島朝天臺松都
碧瀾亭皆昔日朝天之所大食暹羅諸國獻方物元
時設提管府於濟州張士誠方國珍皆連歲遣使於
高麗皆由濟州琉球使臣來泊順天我國亦報聘此
由濟州右洋而行

海中師路

中國師行皆由海取遼東漢彭吳穿濊貊朝鮮燕齊
之間靡然騷動楊僕伐右渠浮渤海至列口列口疑
漢江入海處也光武遣將渡海復清川江以南曹魏
遣劉昕伐之司馬懿伐東國運糧筭水入城於登州

跼蹐魏侵百濟隋大業八年來護兒浮海入涓水駐
平壤唐貞觀十八年征高句麗自萊州趨平壤建烏
胡島於登州北龍朔元年薛烈之滅百濟自登州成
山抵仁川德積島成山之東十里有召石山秦始皇
欲渡海造橋之處元遣范文虎審視黑山島水路由
濟州南洋與麗兵會於一歧島伐倭宣祖戊戌之倭
寇也陳璘發浙江兵來泊唐津詔琉球暹羅東援而
不果以東國兵言之則百濟越海而西以越州為界
此古句踐之都也浮海而北略遼西晉平此古孤竹
之國也觀崔致遠上唐侍中書則百濟又嘗侵撓齊

魯矣高麗高宗壬辰鄭應卿領水手三千謁龍州浦
赴蒙古之請仁廟十八年林慶業李浣領舟師五千
齎十二朔糧會于安義海邊

漕路

高麗忠烈王己丑元以遼東饑索米十萬石高麗運
六萬四千石于蓋州辛卯本國饑元運江南米十萬
石元將征日本運十萬石置江華乙未以遼東饑令
本國輸五萬石于遼我宣祖二十五年皇朝運山東
米十萬石來賑南民毛文龍據榷島自登州運糧餉
金帛絡繹來往仁廟十八年運米一萬石於三义大

小凌河甲申運一萬石乙酉因勅咨運三南而西米
九萬五千石於燕都宋史自明州發艚八日入我境
八日抵碧瀾渡文獻通考自禮成江發艚六日至明
州其實渡海不過二三日鄭夢周言南京八千里九
十日程濟州志朝元時自明月浦發艚七晝夜登西
岸槐院瞻錄自宣沙浦登艚抵登州三千七百六十
里齊都賦海之旁出者為渤海其實一大浦漢書齊
人越海而田田則其尋常往來可知也蓋中國之登
州成山最深入渤海之東我東之長淵亦深入渤海
之西其間相近而白翎島又在長淵之西海中故登

州漁採者多由白翎來往也今白翎島中往來有中
國鷹隼來到

西海犯越防守

仁祖二十四年天津兵餉司差人買秀來泊宣川葛
伊島請糴粟文內無許往朝鮮語朝廷以後弊難保
請申嚴海禁之意具咨戶部戊子福建人徐勝等過
加背梁萬戶景星翼鄭信卿追捕五十一名付之時
來勅使烏黑發回肅宗二十六年福山人曲逆等七
十名寧海人劉增等十三名兩艇到安興俱發回具
咨禮部禮部回咨違禁潛出是賦寇也本國即行延

勦正宗十一年異樣艍三隻來泊椒島鎮捉去瞭望
將李時贊等二人僉使孫壽聃率軍校責其越境被
拿三人乃登州漁採者具咨禮部曰若票文而漂到
者資衣糧轉送蹤跡難測者即逐之去云戊午異樣
艍六隻入吾義鎮僉使秦應會率衆進叫各艍皆跪
下飛椎交下殺民丁二名去姓名居籍聲明無由

日本交聘海路

李恒福曰五島在馬島之右地自五島得東南風至
三島經宿過仙山島直抵古今島加里浦等處自對
馬島得東北風至蓮花欲智兩島之間經宿抵南海

彌助防踏等處此倭入寇全羅之熟路其間水路懸
遠不能朝發夕至必須經宿洋中島嶼而風若不順
又須更候順風所謂蓮花欲智政與慶尚右水營烟
臺通望無礙賊船去來了。指數故五島之賊過蓮
島仙山而犯古今傷者常出於不虞馬島之賊過蓮
花欲智而犯南海等處者常為我覺唯自馬島抵釜
山得正東風則一帆便到而釜山之倚以為勢者只
有右水營右水營與馬島向背異勢故風之順逆亦
隨而別嶺南為受賊之門宜以舟師大將設於釜山
分餘兵扼見乃之口據古今之面金世濂曰左水使

每以三月入防釜山謂之風和八月以後謂之風嚴
防統去釜山三日程賊若乘風張帆是為我艦之逆
風前則七浦入釜山今則四浦移入水營釜山日就
無形使國無南顧憂則已若或有驚何以統駕賊欲
出東萊則必由沒雲臺草梁項欲由晉州順天興陽
等處必由加德前洋加德多大浦去釜山一日程去
統營二日程統使戰于海兵使戰于岸相為犄角不
得下陸庶乎其可笑按日本地形如人字遶我國東
南二海無非倭艦出沒處而東海自古無邊虞矣肥
前薩摩等州與我湘嶺之南陸對直薩摩與濟州最

近而海濤甚惡環島皆石壁不得泊舟惟從川浦口
以入而防堡甚嚴犯之亦難

潮汛

中國潮汐之候余襄公說詳矣我國四海自中國視
之即一東海然東海之中四方各自不同高麗李奎
報詩三兔三龍水三蛇一馬時羊三猿亦二月黑復
如斯蓋極漲時初一日卯初初二日卯中初三日卯
末初四日辰初初五日辰中初六日辰末初七日巳
初初八日巳中初九日巳末初十日午中十一日未
初十二日未中十三日未末十四日申上半十五日

申下半潮在卯則汐在酉潮在辰則汐在戌餘可推
知而此詩乃祖江上作也祖江近處皆不違時而湖
西差早於京畿湖南差早於湖西我國西南海有潮
汐至靈巖之葛頭山東有異至嶺南之金海遂微蔚
山以北東海全無焉海嶠志潮隨月盈虧朔後三日
明出而潮壯望後三日魄見而汐涌每歲仲春月落
水生而汐微仲秋月明水落而潮倍減于大寒弱于
大暑陰陽消長不失其時故潮汛即潮信也每月十
三二十七日曰水起是為大汛各七月初五二十日
曰下岸是為小汛亦各七日天道久晴雖大汛亦不

長鎮江至大海五百里十八日辰時潮至浙江至大海三百里十八日丑時潮至潮之大小隨月之高潮小月低潮大高麗論天地之氣無一息停當其消時便是息時如始復之于乾坤相隨如環海潮亦然當其平于子午是極盛之時正極消之時也繞過子午之半海中之潮生矣是潮汐生于子極于午生于午極于子但初生時甚微又其來甚遠初不之覺至于卯酉以後盛見非生子卯酉也此即一日中之小乾坤一日中之小剝復也按潮汐之進於浦港者非自遠外大海而來其退也亦非歸於遠外大海也凡潮

汐一日之內再進再退若往還於極遠之地則六時之間何以往還乎以水退後浦邊成陸者驗之或十二三里或十五里其進退不過十五里許蓋自起滅於不遠之間互相推引蕩漾者也今浦口之潮方進而海中之潮已退海中之潮方進而浦口之潮已退浦潮之退者為海潮之進者所遮不得盡退少住回頭復向浦口而進潮水欲進螃蟹海蟲之穴水溢而出潮水已退則水之盈於海蟲之穴者漸縮而涸且高山之上有井泉或能潮汐硯滴亦有潮汐皆非自遠而來也我國西沿累千里而三兔三龍之水早晚

差異不大相違中國之浙江鎮江相距不遠而丑辰之間三時以違火州草以東有潮以西無潮濟州一邊有潮而微一邊無潮或有或無其進退之時各異則東北沙海之一日一朝或方之外有一日七潮七汐者無足怪矣

帶方城

南原城唐滅百濟以劉仁軌為帶方州刺史留鎮熊州又於此築城因稱為帶方城府之稱帶方自此始

湖南山城

李恒福全羅道山城圖後叙曰臣以撫軍司堂上訪

問道內山城則全州淳昌高山古阜寶城只有古址
綾城南平順天富有縣則以少泉井停廢已久順天
光州今始卜基而力竭不能等礪山雖已修築而形
勢平夷臣雖或巡審略而不錄就其中渾陽同福羅
州康津井邑南平等處蓋其形止並附記問山城之
設不見於前史而獨我國郡縣在在皆有今因山為
城城勢險峻則自我守之甕聽風扇不必設弩臺露
臺不必建地澁榴蹄不必鑿暗門撞車不必修彼之
雲梯飛樓無所用其與平地守城者功相萬也今就
六城之中以要害論之則蛟龍為第一其次錦城其

次笠岩金城甕城修固也蛟龍距二南咽喉之地扼三路往來之衝雖有巨寇不敢輕衝內地以遺殲後之患矣又以體察使啓曰南原蛟龍山城山無祖宗斗起野中有兩峰北曰密德南曰福德幕山為城城皆石甃昔我太祖嘗駐軍于此與賊戰破之同福甕城石迺縈迴僅通人跡一夫轉石千人莫過真天險也渾陽金城路出山脊一線百轉盤迴六七里真形勢之地也羅州錦城山城三面險峻又有四峰北曰定寧南曰多福西曰怡道東曰露積定寧為主峰東西南三峰拱揖于前又東北兩峰之支環抱而城

洞可以藏兵康津修因山城爲塗盤迴地勢偏側東
門外一峰壁立號曰勿喜又有斷岡四隅斬然未易
攀登井邑笠岩山城山勢崱嶸而頭頂凹陷四顧中
寬城因其勢如馬槽閣在棚上自外仰觀隱隱二儼然
莫測其內險固不及金城而形勢過之肅宗三十一年
閏鎮遠啓曰南原蛟龍山城處要衝之地壬辰之
亂故臣權慄爲都元帥始築此城爲邑城犄角之勢
且得見故相臣李恒福文集則亦以爲三南要害當
以蛟龍爲第一其不可信故臣在任時啓請修築
而遑歸後聞已畢葺城可幸也

鳥嶺城

聞慶鳥嶺城肅宗三十四年石筭城在三處一在嶺
上限湖嶺界一在鷹岩謂之中城一在草谷有軍餉
倉庫三城皆通大路嶺城曰鳥嶺關中城曰鳥東關
草谷城曰主屹開置水口虹霓門

統營

仁祖七年洪錫疏曰統營資糧器械甲于諸鎮而無
城柵使賊潛兵直襲不無內潰之患矣昌原為水陸
要會日本往來必由之臣謂宜急柵統營還兵營於
故昌原二十年朝廷以南事為憂洪錫請築統營城

慶尚監司林墀啓曰故名臣李德馨李恒福韓浚謙
等因忠武公李舜臣閑山前津把守事已有制置成
籌今不可撓易又水將不可使取便登陸以啓僥倖
之路宜復設從事官於統營俾令彈壓事遂寢

關東要衝

地誌云大閑嶺在江陵西四十里自咸鏡道釦山分
水嶺入本道為鐵嶺楸池嶺金剛山又自金剛歷彌
時坡嶺雪岳山所冬羅嶺五臺山為此嶺橫亘千里
古置閑設柵江陵諸郡之稱閑東者以此又云鐵閑
在鐵嶺上高麗置閑門號鐵閑左右緣岡築城今有

遺址李穀東遊錄曰鐵嶺國東之要害所謂一夫當
關萬夫莫開者也柳成龍曰原州鎮管與忠州倚角
淮陽當此路之衝內與楊州相倚而外防鐵關江陵
合海邊之邑以備東海

海西要衝

梁誠之曰海西之延安海州沿邊之要害平山鳳山
陸路之要害鳳山失守則無海西平山失守則無松
都至於長淵與豐川康翎與甕津俱當并為一鎮者
也柳成龍曰江陰為先經理設為鎮守之地若有事
則使大軍來駐又於楮灘東西兩峰設為木柵為別

屯以守之則黃海一道可以保守此外平山二城瑞興山城並當修築以壯直路形勢延安城亦當漸次修繕也

三防嶺

英宗七年尹溥啓曰三防嶺近百里長谷曾無行人往來之事矣近因酒幕入接修補棧道私行與商賈取其徑捷舍鐵嶺而皆從此道關防之有此岐路誠有慮於緩急之際請撤去酒幕廢絕道路

永豐設邑議

英宗二十五年金在魯所達安邊府永豐社別設一

邑三防地等城之意令道臣看審形便啓聞則咸鏡
監司李鼎輔狀啓以為俱非便宜之策就三路湊會
處移設安邊府且兼防禦作獨鎮為宜云金尚星曰
臣曾在東藩亦因朝令使兩邑守令看審永豐形便
矣聞其地勢則如長蛇入谷若欲設邑則終是不可
莫居之處且係北道往來之路則此是關防要害處
設置邊鎮恐亦無妨洪啓禧曰臣曾以御史往北路
時遍看其地山崖斗立且早霜早寒穀不能成熟設
邑置守令則決知其不便而處在四道之交為兩西
關東之要衝設置關防則似不為無助矣

安州為咽喉

柳成龍曰安州為一道咽喉且有積穀不可不堅守
安州不守則平安一道將不可保矣州城雖闊而後
面臨江前面依山若有數千之軍可以守之又曰關
西三路惟博川秦川一路最為關重蓋北路為江邊
列鎮安危之所係也今之備賊博川最緊定州路次
之熙川路又次之若於定州龜城各置一將相與倚
角則一道可得以保也金在魯曰賊之自江邊七邑
入內地者皆湊泊經由於安州此所謂館穀之會也
城內傾空城外南塘村財穀豐盛列肆市販有同京

師若不時賊來則皆為藉寇之資諸議皆以為合南塘而更築一城決不可已云蓋平壤亦有築中城之議而安州南塘之城比平壤中城不翅如繁矣

義州鶴形

漢人張殷登覽統軍亭曰州基乃浮鶴形但冲天鵲山為賊旗於戊乾方凌鶴甚矣幸賴松山翻作飛鵲啄鵲之目沮抑其勢使鶴舞旋斯可美矣今築城於鶴之一翼一翼偏重偏重則必傾若依舊址跨南山而築城植松栢於山巔可保無虞不然必有全城陷沒之患不出數年有丁卯之禍

慈母山城

平安監司洪命耆啓廟堂本以慈山慈母山城爲監
司守禦信地而平壤乃一路要衝若分作子母城高
至十丈可恃爲固義州國之門戶防禦使不當傍守
山城而昌城朔州皆敵來路請增置而脩禦使守昌
朔義州共爲藩蔽金錫胄曰兵營舊在寧邊後移
安州蓋以本州既當大路之衝據險臨江最有形便
故也至於慈母黃龍保山諸城亦宜預定分守之邑
又曰鴨綠以南清川以北各邑皆有山城義州之白
馬龍川之龍骨鐵山之雲暗宣川之鈿山郭山定州

之凌漢嘉山之曉星皆是擇險據要不可不固守者也

鐵竈山城

肅宗九年金錫胄白曰寧邊鐵竈山城周回二十七里山脉来自妙香城東面勢極巉巖南則俯臨大野形勢甚曠其中藥山東臺有等城古址李世華閔維重及今方伯申翼相皆言其當等故今方使李光漢等城云朴世采疏曰東方山城最為所長如安市之却唐兵鴿原之禦契丹龜城之拒蒙古可按而知凡遇大亂輒自倉皇顛沛若非預相形勢設置山城為

其依歸之所使知離此則死不離則生者雖有高城
深池舉將委之以去

平壤府合城中城

閔鎮遠曰平壤城府內城外西南有中城中城之外
又有外城內城外東南隅有牧丹峰此則府城之主
峰也登此則俯瞰城中無有障蔽欲守此城不可捨
置此峰俾賊窺覘內城南門外又有一枝崗麓連亘
數百步高出城上若出中城則所謂崗麓自當入於
城內且城內周圍不過十六里而各邑兵民皆臨急
入城以十六里之城狹窄難容內城無井泉人汲江

水脫有事，夾敵人和毒上流，則城中必渴死。今若以
中城通作一城，則中城多井，泉人不病渴。

諸州基

世宗朝命崔潤德審定諸州郡城基。成規曰：我國設
都邑，非一也。金海為金官國，尚州為沙伐國，南原為
帶方國，江陵為穢貊國，皆彈丸之地。如今之小邑者，
不可勝數。慶州為東京，新羅一千年所都，山川回互，
土壤膏沃，平壤箕子所都，井田之制歷々猶存。今外
城是也，高麗置為西京，以為巡遊之地。永明寺即東
明王九梯宮，棋檍窟。朝天石在焉，永崇殿即高麗長

樂宮之基其鎮山曰錦繡山最上峰曰牧丹峰北面
無水蒙興得以長驅南面帶江妙清據城而叛其所
恨也城門宏大樓閣高兀東有大同長慶兩門南有
含樞正陽兩門西有普通門北有七星門八道之中
惟此都與大都相甲乙成川為松讓國江東為陽讓
國地勢狹隘龍崗山城最壯謗稱龍宮國扶餘為百
濟所都白馬為塹狹窄淺露非王者之居全州為甄
萱所據鐵原為弓裔所據稱泰封國惟松都為王氏
興王之地鵲峰為主山勢周遭高宗以後移入江華
此是海中小島不可稱為都邑也

設柵要法

設柵最有要法古人築城專用土我國則用石二者皆費人工不可易成今有一法最為簡易蓋增損古今營壁及倭陣之制而為之其法植木為柱入土一二尺務令堅固柱上或二處或三處鑿穴令受短杠自內出外半在於內半在於外長可數十尺短杠兩頭又鑿穴令受橫木次第相連使之方正從內外結紮一如人家作壁之狀則內外相成即成複壁而中間空虛可以受土因取外面作塹處粘土難以稿秸和以水汴令半濕實其中而堅築之俟乾更築至於

頭盡處而止高則二丈許或一丈半數日之後土與
木相粘堅結如石因自內外面以細粘泥土塗之如
常時塗壁之狀則儼然成一城矣又於四隅曲轉處
向外面凸出一二間許下面鑿孔穴令放大砲中穿
小穴令放玄黃字鳥銃等砲上頭布板為樓而外面
設防牌以禦賊凡從樓上左右顧盼可以射矢兼為
瞭望敵雖千萬不敢來犯此與木柵之功用力簡省
而收功甚多其堅不讓於石城而其制曲盡於禦賊
此制若行則日長之時不過數百人三四日之力而
即可成矣如此然後多備火藥火砲以待之則柵中

軍士之多寡強弱皆不須論

籌城訣

洪汝河曰我國築城民自齎糧又築城小則徵十邑之民大則徵一道之民有董集之勞有齎送之苦所以每一築城怨聲嗷々城成之後民心離畔不可與守也今築一城則宜蠲免其地之租稅十歲之役民二十日田一結一年之租足以供一人二十日糧有餘也以萬結之邑論之一結出一丁則是日役萬丁一年役二十萬丁十年役二百萬丁夫何城之不築乎日役千丁月役三萬丁六月二十日役二十萬丁

自九月初一日至三月二十日放役日役五十刻冬
則燃炬

築城以甃議

正宗七年洪良浩疏曰以燕薊數千里之間所見城
堞言之舉皆累甃而不用石如殘堡小縣俱築崇墉
以禦外侮則城墉之築可知其無難而築城之無難
蓋由於燔甃之至易也我國則大小城垣非石不築
故雖西南諸邑之當敵直路處亦無數仞之障蔽蓋
緣財力之不給以致設施之疎虞誠以他山之石攻
堅費力輸遠貽勞故也燔甃之論自古有之而特以

燔燒不得其要薪樵從以難繼有意莫試願惟久矣
蜀叅幹數十檐足可備造甍一窰之薪誠然則所費
至些所利許大夫何憚而不為哉此法一出流布必
廣宮室倉廩也墻壁階庭也必將惟甍是用其工大
省矣

江邊七邑養木之議

景宗三年尹就商啓曰江邊七邑嶺隘形便沿江一
帶種樹長養茂密叅天使彼人越望而不得窺我虛
實古人所以用心養木者夫豈偶然而近年以來恣
意斫伐廣起火田而為其守令邊將者利其捧稅不

曾禁斷以致諸嶺樹木童濯無餘自今為始關西之
江邊七邑海西之中山七鎮嶺南之鳥嶺竹嶺雲峰
之八良嶺端川之磨雲嶺等處分付道臣帥臣嚴飭
地方官多植雜木此外諸道嶺隘之要害處令各一
體養木

赤島

初穆祖在韓東與女真諸千戶數相宴會翼祖威德
漸盛諸千戶手下之人皆歸心諸千戶忌而謀害詭
曰吾等將獵北地請傳會二十日翼祖許之親往矣
關城渴欲飲老嫗進水因言曰此處之人實因請兵

而去翼祖惶遽與孫夫人至慶興後峴望見賊騎走
馬至赤島忽水退畢涉而水復大至遂陶穴而居

鬱陵島

島在蔚珍縣東海中與日本之隱岐州相近三峰岌
業撐空南峰稍早日清則峰頭樹木及山根沙渚歷
歷可見風便二日可到地方百里產柴胡藁本石楠
藤草諸香木蘆竹多合抱者蘆實桃核大可為柁并
山猫大如大鼠大如猫海中有大數牛形赤眸無角
羣卧海岸見人獨行害之遇人多走入水名可之此
島本于山國新羅恐道守倭為寇刷出居民空其地高

麗顯宗壬戌島民被女真寇掠逃來者多處之禮州
為編戶德宗壬申島主遣其子夫於仍多郎來貢仁
宗己未滇州道監倉使李陽實入島取果核木葉異
常者以獻毅宗己卯遣滇州監倉金柔立往視欲復
為縣回奏云島有大山自山頂東距海一萬餘步西
距海一萬三千餘步南距海一萬五千餘步北距海
一萬餘步有村落墟七所破礎尚存或有石佛石塔
鐵鍾地多岩石人不可居遂寢其議後崔忠獻以本
島土壤膏沃多珍木海錯遣使移本郡民以實之爰
為風濤所盪因還本朝太宗聞海民多逃入再命三

陟金麟兩為安撫使刷出世宗二十年遣縣人南顯
率數百人往搜逋民盡俘金九等七十餘人而來其
地遂空成宗二年遣朴宗元取大竹大鯢魚光海七
年倭差船二隻謂將探儀竹島形止朝廷不許今東
萊府使朴慶業荅書曰攬越窺覷非隣好之道所謂
儀竹島實我國之鬱陵島也今雖廢棄豈可容他人
冒居乎肅宗十九年倭言鬱陵島固知為貴國之地
壬辰後為日本所占據者貴國芝峰類說中不有之
乎首譯朴再興曰壬辰亂兵所據不獨鬱陵一島而
已類說所論非所可援二十八年三陟營將李浚明

入島而還獻其苗形及紫檀香青竹石間朱魚皮等物

壽昌宮

宮在松都麗朝自延慶宮移御于此我太祖亦登極于此今本府倉庫

本朝宮室興廢

景福宮太祖三年建鄭道傳取介甫景福之義獻名明宗八年火思政殿以南皆毀九年重修宣祖二十五年倭亂燬因廢今上乙丑重建昌德宮國初建宣祖二十五年燬光海元年重建昌慶宮在昌德宮東

壽康宮舊基成宗十四年為貞熹王后仁粹大妃安
順王后三宮而建宣祖二十五年燬光海八年重建
慶熙宮光海八年建初號慶德宮英宗三十六年以
與章陵謚號同改今名今上乙丑撤用景福宮役

敬奉閣

英宗四十六年建于慶熙宮御筆扁額奉國朝以來
領陟詔勅昌慶宮又有欽奉閣

奎章閣

世祖朝梁誠之奏曰君上御製與雲漢同其昭回萬
世臣子所當尊閣而寶藏故宋朝聖製例皆建閣而

藏之設官而掌之乞令臣等勘進御製詩文奉安于
麟趾閣東別室名曰奎章閣又諸書所藏內閣名之
曰秘書閣皆置大提學直提學直閣應教等官堂上
以他官帶之卽僚以藝文錄官無差俾掌出納世祖
亟稱其可行而設施則未遑也肅宗二十年建于宗
簿寺御筆扁額正宗丙申始建于大內宙合樓正宗
御筆以奉當宁御真御製御筆冊寶奉謨堂以奉列
朝御製御筆御畫顧命遺誥密教及璿譜世譜寶鑑
狀誌閱古閣皆有窩並藏華本國籍移安閣舊名書
香閣御真御製御筆移奉曝曬之所西庫藏東本扁

籍塲文院在金帟門內弘文館右即舊都總府正宗
五年取為閣臣豹直所御筆扁額

各宮

仁慶宮在西部仁王山下本元宗私第光海八年以
術者云塞門洞有王氣初是宮以壓之仁祖反正後
即為毀撤於義宮俗稱上於義宮在中部慶幸坊仁
祖潛邸龍興宮俗稱下於義宮在東部崇教坊孝宗
潛邸彰義宮在北部順化坊英宗潛邸壽進宮在中
部壽進坊本齊安大君第明禮宮在西部皇華坊本
慶運宮癸巳回鑾後宣廟長御此宮光海時仁穆大

妃退處于此亦號西宮仁祖癸亥即位于此宮龍洞
宮在西部皇華坊世傳順懷世子舊宮梨峴宮在東
部蓮花坊世傳光海君舊宮今為壯勇衛營行禧宮在
京城西十五里楊州地定宗傳禪後時御此宮

文廟

文廟在東卽崇教坊太祖七年建定宗二年火太宗
七年重建卞季良撰碑宣祖二十五年燬三十五年
重建李廷龜撰碑尊經閣成宗六年建徐居正撰記
宣祖二十五年燬三十五年重建至闡堂顯宗六年
建啓聖祠肅宗二十七年建崇節祠英宗元年建三

十六年御筆揭板六一閣英宗十九年建

廟祠

南闕王廟宣祖三十一年天將陳璘建東闕王廟皇
朝命撫臣萬世德建宣武祠宣祖三十一年建俗稱
生祠堂祠皇朝兵部尚書邢玠御筆揭板三十七年
並享皇朝經理楊鎬

各司

報漏閣光海六年建今漏局別軍戎廳孝宗七年建
都摠府正宗五年自昌德宮移設耆老所太祖三年
建宗親府國初建忠勲府太宗朝建燕山十年撤罷

中宗初移建儀賓府國初建燕山十年徽中宗十一年移建敦寧府太宗十四年建備邊司明宗十年建宣惠廳光海戊申建均役廳英宗二十七年建濟川司英宗三十六年建中樞府國初建義禁府太宗十四年建柳誠源撰記世傳世祖朝監察鄭保籍沒以其家為府吏曹戶曹二廨國初建分戶曹光海元年建禮曹世傳鄭道傳敗後取三軍府為曹兵刑工曹漢城府四廨國初建司憲府國初建徐居正撰記司諫院太宗二年建徐居正撰記成均館國初建成侃撰記承文院舊在北部世宗十五年移建于禁中李

叔瑛撰記宣朝二十五年燬正宗十一年移設校書
館國初建李承召撰記讀書堂中宗十年建曹偉撰
讀書堂記尹鉉撰文會堂記李植又撰湖堂故事龍
虎營英宗三十年建訓鍊都監宣祖二十七年建別
營顯宗十四年建糧餉廳宣祖二十七年建禁衛營
肅宗九年建南別營英宗六年建御營廳仁祖二年
建總戎廳仁祖二年建舊在北部英宗二十六年移
設經理廳肅宗三十七年建英宗三十三年徙于總
戎廳訓鍊廳國初建左右捕盜廳國朝中葉建左右
巡廳軍戢廳三廨國初建衛將所文宗元年建忠翊

府國初建肅宗二十七年併于勲府壯勇營正宗十
一年梨峴別宮為營通禮院國初建掌隸院世祖十
二年建英宗四十年革罷為保民司五十一年永
罷奉常寺司宰監宗簿寺司僕寺軍器寺內資寺內
膳寺司道寺八廨國初建禮賓寺國初建舊在西部
正宗二年移設于南別宮內司膳寺太宗朝建肅宗
三十一年革罷軍資監濟用監繕工監三廨國初建
掌樂院觀象監典醫監司譯院廣興倉五廨國初建
豐儲倉國初建今并于長興庫典艦司世祖十年建
南表櫺記今屬工曹宗學世宗九年建中宗朝革罷

濟生院太祖六年建後革罷內需司國初建昭格署
國初建宣祖二十五年後革罷宗廟署社稷署平市
署三廨太祖元年建義盈庫水庫掌苑署長興庫司
圖署養賢庫典牲署七廨國初建司畜署太祖元年
建英宗四十三年革罷併于戶曹造紙署惠民署
畫署典牲署活人署尾署六廨國初建歸厚署太宗
六年建正宗元年革罷併于戶曹中學東學南學西
學四廨太宗十一年建北學初建稍後於四學未幾
還罷中部東部南部西部北部五廨國初建太清觀
國初建後革罷長生殿世宗十四年建扁以東園門壽

神所國初建能磨兒廳仁祖朝建慕華館本慕華樓
世宗十二年改樓為館有紅箭門中宗三十年改立
雙柱門扁曰迎恩天使朱之蕃筆揭額鍾樓在中部
雲從街太祖四年建閣世宗朝改構層樓為十字街
權近撰鍾銘鍾閣世祖二年鑄大鍾初置禁中後構
閣于光化門外以懸之申叔舟撰鍾銘宣祖二十五
年燬英宗二十四年更建華陽亭本司僕寺牧場世
宗十四年建取歸馬華陽之義命名柳思訥撰記樂
天亭太宗傳禪後剏離宮於東郊臺山作亭其上卞
季良撰記今廢七德亭世祖屢幸閱武今廢皇華亭

燕山建中宗反正後賜齊安大君瑄今廢流霞亭本
壽進宮屬廨正宗五年命賜奎章閣作遊賞之所喜
而亭本孝寧大君補別墅世宗七年辛酉郊觀稼賜
名成宗朝月山大君改構名望遠亭每歲春秋省農
及親臨觀水戰時常御此亭

東朝萬壽殿

孝宗六年上以慈懿大妃處所狹隘親相基於欽敬
閣舊址別建殿曰萬壽金墉疏曰欽敬之基在仁政
殿之外露出山樊金帟曜金兩門在左右西營址營
在其外駢闐喧聒自古太后之所御必在大內之東

故謂之東朝昌慶在東亦以此也移設於正殿西偏
近外之地回互而且遠不合於古禮尚左之義也

景福宮修理

明宗八年重修景福宮李滉撰記後朴東亮曰尹漑
以都監提調往審見外閣窓戶皆用真彩捉致該郎
李仁健而責之曰惟大內寢室用真彩而么磨一微
官敢取媚要譽當論毀制之律

敬德宮

宮在開城府楸洞我太祖潛邸舊宅後增脩為宮肅
宗十九年駕幸舊都御製碑文命豎于舊宮

穆清殿

殿在開城府崇仁門內太祖舊宅也太宗朝建奉安
太祖影幘宣祖二十五年倭亂燬殿廢肅宗十九年
御筆豎碑殿墟

江華府

行宮在府北仁祖九年留守李時白建肅宗三十七
年留守閔鎮遠改建璿源閣在府南三十里傳燈山
鼎足山城顯宗庚子留守柳滄建史閣在璿源閣南
顯宗庚子留守柳滄建肅宗四年始奉實錄三十三
年改建翠香堂史閣別館二錄權奉所外奎章閣在

行宮東正宗五年留守徐浩修撤燕超軒而移構移
置本府舊藏內冊庫秘書丈人臺俗稱南將臺在府
治南山上舊有石臺英宗己丑留守黃景源建閣撰
記內城西門樓燕尾亭在月串鎮舊為武將黃衡別
業今屬鎮英宗甲子留守金始煥重建撰記亭東有
小島其名為留漢南入甲串津西入界天浦分流為
二歧似燕尾故名焉

廣州府

行宮仁祖二年建上闕七十二間半下闕一百五十
四間肅宗三十七年增建左殿二十六間右室四間

無忘樓在西將臺英宗辛未留守李箕鎮建枕戈亭
在城內李曙築城時得一古閣於林藪中英宗辛未
留守李箕鎮重修命名

狎鷗亭

南孝溫曰韓上黨明澮構亭漢江之南名曰狎鷗欲
以定策切擬韓忠獻也朝廷文士爭相和韵判事崔
敬立詩曰三接慙懃寵渥優有亭無計得來遊腦中
政使機心靜宦海前頭可狎鷗明澮惡之不列懸板

逍遙亭

沈相貞於陽川構逍遙亭遍請一時作者以懸板朴

訥齋祥有半山排案俎秋壑閣樽盃沈知其讖已拔
去趙靜菴謫湖南返契朴訥齋以詩哭之曰分手院
前曾把手恠君黃閣落朱厓朱厓黃閣莫分別方到
九原無等差

清心樓

驪州客館此高麗時建

廣寒樓

樓在南原府南二里舊名廣通樓歲久頽廢世宗甲
寅府使閔恭政構鄭隣趾改今名黃守身撫記宣祖
丁酉倭亂燬已亥府使元慎略構小樓仁祖丙寅府

使申鑑始重建

慶州府

集慶殿在本州客館北國初建奉安太祖影幘宣祖二十五年倭亂燬後仍廢客館前朝忠肅時災本朝世祖甲申府尹鄭興孫重建徐居正撰記宣祖庚寅災壬寅建

暎湖樓

樓在安東府南五里前朝恭愍王避紅賊南奔至此樓遊賞親書暎湖樓三字作樓榜戊申判官申自展構扁榜白文寶作金榜記李穡撰記本朝成宗戊申

府使金著重建金宗直撰記宣祖乙巳為大水湮沒
肅宗丙辰府使孟曹瑞重建英宗乙未又湮沒正宗
丁未府使李集斗重建

矗石樓

樓在晉州府南一里矗石城內麗季燬于兵燹太宗
癸巳牧使權襄重建河崙撰記

嶺南樓

樓在密陽府客館東即古嶺南寺之小樓後廢前朝
恭愍王乙巳知郡事金溪因舊改創因以寺名名之
撰記本朝府使安質重修世祖庚辰府使姜叔卿重

修恢拓申叔舟檣記景宗壬寅火甲辰府使李熙疇
重建

蓬萊閣

閣在原州宣化堂北蓮池中肅宗甲子前監司申琬
建英宗丙寅監司金尚星重修檣記

昭陽亭

亭在春川府東六里昭陽江岸諺傳三韓時所創中
間改稱二樂樓後復今名宣祖乙巳大水漂去光海
庚戌府使李希聘建正宗丁酉又水漂庚子府使李
東馨重建檣記

海山亭

亭在高城公衙西明宗丁卯郡守車軾建肅宗丙寅
郡守李迪吉重建英宗甲戌郡守安鑽城改建

月波樓

樓在黃州一名昇天樓下有絕壁宣祖丙午天使朱
之蕃刻黃岡赤壁四字又扁樓額

芙蓉堂

堂在海州客館西牧使金公望改建宋時烈撰記

洞仙別館

館在鳳山郡南四里英宗戊午北使來時負役一人

死于客館其後北使拘忌不入館每設假家公私擾攘丙子郡守具鼎煥作別館五十間又鑿一井買置田土柴塲俾作館待之需民弊永去

咸興府

本宮在府南十五里雲田社即太祖舊邸宣祖二十五年倭亂燬光海時監司韓浚謙重修有肅宗朝御製遺弓銘一篇有豐沛樓慶興殿在府東十五里歸州洞翼祖避賊于慶興赤島自赤島遷咸興胥宇于此故人謂之慶興宅太祖登極後始建此殿屢經兵燹殿基荒廢孝宗戊戌監司鄭志和重建有肅宗朝

御製詩一篇讀書堂在歸州洞雲峯山下太祖潛邸
時立精舍澗邊磐石上為讀書之所屢經兵燹階砌
尚存肅宗甲申監司金演因舊址重建遂揭讀書遺
址四字樂民樓在府城西二里城川江上古有樂民
亭宣祖壬辰燬丁未監司張晚建樓肅宗御製七言
律詩一篇揭焉

永興府

濬源殿在府東南十三里黑石里奉安太祖影幃殿
東青龍外有櫓木彌櫓亭太祖潛邸時遊憩處嘗為
大風所拔更生茂密

平壤府

永崇殿在府城內肅朝長樂宮舊基奉我太祖影幀
丁卯兵火後仍廢浮碧樓在府南五里乙密臺下永
明寺東前朝僧與上人建睿宗西巡平章李潑命名
本朝世祖庚辰申叔舟撰記光海癸丑監司金蓋國
重建宣祖初天使許國曰勝與蘇杭相頡頏而蘇杭
繁華侈麗天下無比然皆賴人力之致浮碧清流碧
嶂島嶼峯岫實出天作勝於蘇杭挹瀨樓即大同門
樓太祖甲戌府尹趙溫建權近撰記宣朝丁丑監司
金縑輝重建練光亭在大同門外中宗庚辰監司許

碭建天使唐皋撰記

統軍亭

亭在義州府客館北成宗戊戌牧使韓千孫改構增其舊制任士洪撰記

降仙樓

樓在成川府客館西沸流江西岸額明朝翰林米萬鍾筆總二百餘間樓觀之壯江山之麗中國罕比肅宗丁酉後重建英宗朝又重建







